



Republika e Kosovës
Republika Kosova - Republic of Kosovo

AGJENCIA KUNDËR KORRUPSIONIT
AGENCIA PROTIV KORRUPCIJE
ANTI - CORRUPTION AGENCY

REPUBLICA E KOSOVES/REPUBLIKA KOSOVA/REPUBLIC OF KOSOVO
AGJENCIA KUNDËR KORRUPSIONIT
AGENCIA PROTIV KORRUPCIJE
ANTI-CORRUPTION AGENCY

Dep. DPKI
Nr. Prot. 06-01/730/21
Broj stranica 02
Prishtine
05-03-2021

Në mbështetje të nenit 11, paragrafi 1, nënparagrafi 1.1, nenit 5, paragrafi 1 pika 1.5, nenit 18, paragrafi 10 dhe 11 të Ligjit nr. 03/L-159 për Agjencinë Kundër Korrupsionit, si dhe nenit 7 paragrafi 4 të Rregullores nr. 01/2018 për Ndryshimin dhe Plotësimin e Rregullores Nr. 01/2014 dhe Rregullores Nr. 01/2017 të Punës së Agjencisë Kundër Korrupsionit, Drejtori i Agjencisë Kundër Korrupsionit me datë 03.03.2021, mori:

V E N D I M

- I. Mbyllet rasti me Nr. *AKK-DPKI-06/380/21*, për zyrtarin e lartë z. Jeton Zeneli, Këshilltar Komunal i Kuvendit Komunal të Mitrovicës së Jugut, për shkak së është shmangur gjendja e papajtueshmërisë, përkatësisht konfliktit të interesit në ushtrimin e funksionit publik.
- II. Rasti mund të rihapet në çdo kohë në rast se paraqiten rrethana të reja.

A r s y e t i m i

I. Në rastin e shqyrtuar për konflikt të interesit me numër protokolli: *AKK-DPKI-06/1184/19*, që për subjekt trajtimi ka pasur zyrtarin e lartë z. Jeton Zeneli, Këshilltar Komunal i Kuvendit Komunal të Mitrovicës së Jugut, është zhvilluar procedura e paraparë sipas Ligjit Nr.06/L-011, për Parandalimin e konfliktit të interesit në ushtrimin e funksionit publik (në tekstin e mëtutjeshëm: Ligjit për parandalimin e konfliktit të interesit).

Agjencia kundër Korrupsionit (në tekstin e mëtutjeshëm: Agjencia), sipas detyrës zyrtare ka identifikuar rastin nën dyshimin për konfliktit të interesit, sipas të cilit z. Jeton Zeneli, krahas ushtrimit të funksionit si zyrtar i lartë publik, respektivisht Këshilltar Komunal i Kuvendit Komunal të Komunës së Mitrovicës së Jugut, i njëjti figuronte si përfaqësues i autorizuar në biznesin individual D.P.T. "Jetoni".

Agjencia, përmes shkresës zyrtare *AKK-DPKI-06-3038/20*, e ka njoftuar zyrtarin e lartë z. Zeneli, për fillimin e shqyrtimit të gjendjes së mundshme të konfliktit të interesit. Pas pranimit të kësaj shkrese, është organizuar takim me zyrtarin e lartë në Agjencinë kundër Korrupsionit. Zyrtari përgjegjës i Agjencisë e ka njoftuar gjerësisht zyrtarin e lartë, z. Zeneli, lidhur me rastin në fjalë, duke i sqaruar se gjatë ushtrimit të funksionit publik, në cilësinë e zyrtarit të lartë publik, i njëjti nuk mundet që njëkohësisht të mbajë funksion drejtues e as të jetë përfaqësues i autorizuar në biznesin privat, sepse kjo situatë paraqet gjendje të papajtueshmërisë me ushtrimin e funksionit

publik, siç përcaktohet me nenin 13, paragrafi 1, të Ligjit për Parandalimin e Konfliktit të Interesit, ku thuhet se:

“Zyrtari i lartë nuk mund të jetë menaxher, përfaqësues i autorizuar ose anëtar i ndonjë organi menaxhues apo mbikëqyrës i personave juridikë privatë, fitimprurës sipas ligjit përkatës për shoqëritë tregtare dhe organizatave joqeveritare, përjashtuar subjektet e përcaktuara në nenin 14 të këtij ligji, subjektet politike si dhe rastet kur një funksion i tillë i dedikohet me ligj për shkak të funksionit”.

Pas takimit të mbajtur me zyrtarin e lartë, i njëjti është pajtuar me gjetjet e Agjencisë dhe ka deklaruar se do të ndërmarr veprime konkrete duke bërë ndryshimet e nevojshme në Agjencinë e Regjistrimit të Bizneseve në Kosovë në mënyrë që të shmang papajtueshmërinë në ushtrimin e funksionit publik.

Ndërkohë, Agjencia ka pranuar shkresën zyrtare: DPKI-06/3038-1/20, me të cilën dëshmohet se zyrtari i lartë z. Jeton Zeneli, ka bërë ndryshimet e nevojshme duke mbetur vetëm pronar në biznesin privat D.P.T. “Jetoni”, ndërsa menaxhimin dhe përfaqësimin e biznesit në fjalë e ka bartur tek personi i besuar, siç parashihet në nenin 15 të Ligjit për Parandalimin e Konfliktit të Interesit.

Me veprimet e ndërmarra nga zyrtari i lartë z. Jeton Zeneli, Këshilltar Komunal i Kuvendit Komunal të Mitrovicës së Jugut, janë krijuar rrethana të reja me çfarë është shmangur gjendja e papajtueshmërisë, përkatësisht konfliktit të interesit në ushtrimin e funksionit publik për zyrtarin e lartë.

Prandaj, në bazë të asaj që u tha më sipër, u vendos si në dispozitiv të këtij vendimi.

II. Në mbështetje të nenit 18, paragrafi 11 të Ligjit Nr. 03/L-159 për Agjencinë Kundër Korrupsionit, Agjencia mund të rihap rastin në çdo kohë nëse paraqiten rrethana të reja.

Vendimi iu dërgohet:

- Zyrtarit të lartë publik
- Drejtorit të DPKI- së
- Z./znj. (zyrtari përgjegjës)

Shaip Havolli
Drejtor i Agjencisë Kundër Korrupsionit